

# BOLETÍN SOBRE RESPONSABILIDADE SOCIAL DA Universidade de Vigo

SETEMBRO 2017

PUBLICACIÓN ELECTRÓNICA MENSUAL ELABORADA POLA UNIDADE DE ANÁLISES E PROGRAMAS

## O Sistema Universitario Galego comeza o curso reivindicando a súa eficiencia, equilibrio e competitividade



O acto solemne de apertura do curso celebrouse este mediodía na Universidade de Vigo

O Sistema Universitario Galego celebrou este mediodía no campus de Vigo o acto solemne de apertura do curso académico 2017-2018, reivindicando a existencia das tres universidades que o conforman e poñendo en valor sinais de identidade como súa singularidade, igualdade, eficiencia e competitividade. No salón de actos da Facultade de Ciencias Económicas e Empresariais o reitor da Universidade de Vigo, Salustiano Mato, destacou as luces e sombras "dos oito anos máis difíciles para o SUG", nos que a colaboración entre as universidades e o executivo autonómico materializouse na consecución de dous plans de

financiamento, a conxelación das taxas durante cinco anos consecutivos e a materialización dun mapa de titulacións. Pola súa banda, o presidente da Xunta, Alberto Núñez Feijóo, que comezou a súa intervención cunha reivindicación da democracia e das regras que a fan posible, afirmou na eficiencia das universidades galegas e no retorno cualitativo e cuantitativo da súa actividade á sociedade.

[+info](#)

## Setembro tamén é tempo de cursos de verán



A educación dixital e o turismo enolóxico son as súas temáticas.

O groso da programación de cursos de extensión universitaria que cada ano se organizan no campus de Ourense co financiamento da Deputación de Ourense ten lugar nos meses de xuño e xullo. Porén, algunhas das súas propostas desenvólvense en setembro. Deste xeito, alumnado e cidadáns interesados aínda teñen a oportunidade de realizar durante as vindeiras semanas os cursos *A sociedade da información (III): preocupacións educativas nun mundo dixital*, organizado desde a Facultade de Ciencias da Educación, e *Turismo baseado na cultura da produción*

*tradicional do viño, da cervexa e da sidra*, posto en marcha desde a Facultade de Ciencias Empresariais e Turismo.

[+info](#)

## Escalada, radio, cine, impresión 3D e percusión centran a renovada oferta de obradoiros do campus

Trátase de cinco talleres de 30 e 32 horas que se desenvolverán entre setembro e decembro



Co propósito de dar cabida a novas propostas dentro do seu programa de actividades de Extensión Universitaria, a Vicerreitoría do campus impulsa un renovado programa de obradoiros para este primeiro cuadrimestre. A iniciación á creación dun programa de radio e á escalada en rocódromo combínanse coa análise e escritura fílmica, a impresión 3D e a ecopercusión nunha oferta formativa que mantén aberta a súa inscrición. "Trátase de propostas abertas a todo o mundo, que irán pechando as súas prazas por orde de inscrición e ás que buscaremos sumar outras actividades", apunta

o responsable de Extensión Cultural do campus, Manuel Morquecho.

[+info](#)

## Preto de 40 actividades en doce sedes conforman a programación do Pont-Up Store 2017

Un 'fablab' en Belas Artes complementará a feira na que 40 empresas amosarán os seus proxectos



Preto de 40 actividades, entre obradoiros, seminarios, coloquios e encontros, que se desenvolverán en doce espazos da cidade, conforman a programación do Pont-Up Store 2017, o evento dedicado ao emprendemento que a Universidade, no marco do Campus CREA S2i, promove en Pontevedra entre o 21 e 23 de setembro. Máis de 40 novas empresas amosarán nestas xornadas os seus produtos e servizos no recinto instalado na Praza de España, que nesta cuarta edición conectarase co *fablab* que

terá lugar nas salas de exposicións da Facultade de Belas Artes e da Escola Superior de Conservación e Restauración de Bens Culturais de Galicia.

[+info](#)

## A industria pesqueira non é un negocio só de homes

Universidade de Vigo e Deputación de Pontevedra promoven as bolsas dunha semana da duración



Asegura Marie Christine Monfort, presidenta e cofundadora da International Association for Women in the Seafood Industry (WSI), que aínda que as mulleres representan o 50% da industria pesqueira, menos do 1% ocupa postos de dirección executiva nas empresas do sector. Foi precisamente a participación de Monfort o pasado mes de setembro no ciclo *Conversas en Empresariais*, que organiza a Escola Universitaria de Estudos Empresariais da Universidade de Vigo, a que propiciou a posta en marcha do programa *Visibilidade das mulleres en postos de decisión e*

*sustentabilidade da industria e da pesca*, do que se beneficiarán tres ex alumnas do Máster en Comercio Internacional.

[+info](#)

## Chega a Vigo a exposición 'Un rolo de papel continuo', traballo coral de oito artistas con selo pontevedrés

Con Nono Bandera, Marcos Covelo, Nuria Figueiredo, Berto Fojo, Julia Huete e Natalia Umpiérrez



Hai pintura, un mural, unha instalación... Tras o seu paso pola cidade de Pontevedra a comezos de ano chega agora a Vigo a mostra *Un rolo de papel continuo*, un proxecto coral que ten como comisaria á profesora Susana Cendán e no que participan seis artistas ligados á Facultade de Belas Artes, ben como profesores, caso de Nono Bandera, ben como egresadas e egresados (Marcos Covelo, Nuria Figueiredo, Berto Fojo, Julia Huete e Natalia Umpiérrez). A exposición, de entrada libre e gratuíta, ábrese ao público esta tarde na Sala 1 da Sede Afundación de Vigo,

pero esta mañá celebrouse xa un acto de presentación.

[+info](#)

## 25 sorrisos que reivindicán un futuro para a infancia

Comisariada polo profesor Jorge Soto, reúne unha serie de retratos da egresada Sandra Martínez



25 rostros de nenos e nenas marcados na súa meirande maioría pola presenza dun sorriso reúnen desde a tarde do pasado mércores na sala de exposicións da Casa das Campás, que acolle ata este venres 15 de setembro a exposición *Miradas da infancia*, unha compilación de 25 retratos realizados pola artista e egresada Sandra Martínez. Co profesor da Facultade de Ciencias da Educación e do Deporte Jorge Soto como comisario, a exposición ten por obxectivo "reivindicar os dereitos dos nenos, chamar a atención e sensibilizar sobre o mundo no que vivimos e o futuro da

infancia".

[+info](#)

## Italia e Alemaña, principais países de procedencia dos 384 estudantes de intercambio dos tres campus

A esta cifra haberá que sumar os que aínda poden solicitar unha estadía no segundo cuadrimestre



Muller, beneficiaria do programa Erasmus, procedente de Italia ou Alemaña e coa Facultade de Filoloxía e Tradución como centro de acollida. Este é o perfil xeral do alumnado de intercambio que cursará os seus estudos durante este curso 2017-2018 na Universidade de Vigo. En total son 384 mozas e mozos entre os tres campus: 84 deles quedarán todo o curso académico, 276 optaron polo primeiro cuadrimestre e 24 polo segundo, aínda que para esta última opción a matrícula continúa aberta ata finais de ano. Do total, 241 son mulleres e 143 homes. Dos 384 estudantes que xa confirmaron a súa estadía na Universidade de Vigo 300 elixiron escolas e facultades de Vigo; 25 de Ourense e 59 de Pontevedra. Para todos eles, este luns o campus de Vigo celebrou o tradicional acto de benvinda.

[+info](#)

## O II Simposio Internacional sobre Termalismo e Calidade de Vida reunirá a 200 profesionais e investigadores

A actividade desenvolverase no marco da 17ª edición da feira Termatalia



Un foro de encontro de arredor de 200 profesionais e investigadores relacionados co termalismo que quere fomentar a transferencia de coñecemento e estimular o contacto entre os diferentes axentes do sector. Con este obxectivo preséntase o II Simposio Internacional sobre Termalismo e Calidade de Vida, que os días 20 e 21 de setembro de 2017 terá lugar ligada á celebración da 17ª Feira Internacional do Turismo Termal, Saúde e Benestar (Termatalia). A iniciativa está organizada no marco do proxecto de especialización do campus de Ourense como Campus da Auga.

[+info](#)

## México encabeza a relación de 15 países que achegan estudantes estranxeiros ao campus

44 mozos e mozas permanecerán en Pontevedra o primeiro cuadrimestre e outros 12 todo o curso



Procedentes de 15 países de tres continentes, as universitarias e universitarios chegados nestes meses a Pontevedra para vivir unha experiencia formativa e vital reuníronse este mércores na Casa das Campás, onde representantes de diferentes servizos da Universidade quixeron guíalos nos seus primeiros pasos no campus. Con México, Portugal e Brasil como principais países de orixe, Pontevedra recibe neste primeiro cuadrimestre un total de 44 estudantes internacionais, aos que hai que sumar, para un total de 59, os doce que permanecerán na cidade o curso completo e os tres polo de agora confirmados para o segundo cuadrimestre.

[+info](#)

## Dúas semanas de portas abertas para poñer en movemento á comunidade universitaria

Entre os días 18 e 30, será libre a participación nas actividades dirixidas para aboados e aboadas



O inicio dun novo curso constitúe tamén é unha boa oportunidade para manterse ou poñerse en forma e para axudar neste propósito a Área de Benestar, Saúde e Deporte da Universidade propón no campus unha serie de servizos e actividades que desde inicios de mes manteñen aberta a súa inscrición. Ademais de ligas internas ou dos centros deportivos colaboradores, a área organiza por segundo curso unha serie de actividades dirixidas gratuítas para os usuarios dos abonos *Muver* e *Ponte en Forma*, que estarán abertas á participación de calquera membro da comunidade

universitaria entre os días 18 e 30 deste mes.

[+info](#)



## Comeza un curso moi deportivo

O programa de actividades inclúe escolas deportivas, ligas, servizo de saúde e diferente tipos de abonos



Tanto para as persoas que queiran retomar a actividade física tras as vacacións estivais, como para aquelas que pretenden comezar a realizar algún deporte como propósito para o novo curso, a Área de Benestar, Saúde e Deporte ten deseñado un completo programa formativo para o primeiro cuadrimestre. Para todo tipo de persoas, con calquera condición física e sexa cal sexa o deporte que lles interese, a programación cubre case todas as necesidades. Como cada ano, desenvolveranse escolas deportivas, ligas universitarias, escolas deportivas, programas de lecer na natureza, etc. e ofértanse tamén abonos para o uso da instalacións deportivas universitarias ou dos centros asociados en Vigo, Ourense e

Pontevedra. O prazo de matrícula estañá aberto dende o día 1 deste mes.

[+info](#)

## O Centro de Investigación Mariña postúlase como referente mundial na preservación funcional de recursos biolóxicos mariños

Será pioneiro no uso dun láser de infravermellos de desconxelación ultrarápida en tipos celulares mariños



A preservación de recursos biolóxicos mariños en estado funcional en calquera época do ano suporía unha auténtica revolución para a I+D mariña ao reducir de maneira significativa os custos, tanto de recolección, como o mantemento de organismos en cativeiro, así como problemas asociados á estacionalidade dos recursos. Aínda que a criobiología comezou a aplicarse ao medio mariño na década de 1970, na actualidade non existen máis dunha ducia de laboratorios no mundo dedicados, na maior parte dos casos a tempo parcial ou como actividade secundaria, a esta disciplina científica. O Centro de Investigación Mariña da Universidade de Vigo consciente desta oportunidade estratéxica, traballa desde hai anos para confirmarse como unha referencia

internacional neste ámbito, centrándose no desenvolvemento de metodoloxías que melloren o funcionamento dos grandes biobancos mariños existentes e cos que o centro colabora.

[+info](#)

## A Sociedade Europea de Endocrinoloxía premia á bióloga Yolanda Diz

O seu traballo abre novas liñas para o tratamento da diabetes, a obesidade e trastornos asociados



A investigadora do Laboratorio de Endocrinoloxía da Universidade de Vigo Yolanda Diz Chaves, adscrita ao Centro de Investigación Biomédica, Cinbio, é unha das tres gañadoras do Poster Prize Winner que cada ano outorga a Sociedade Europea de Endocrinoloxía en recoñecemento aos mellores pósters presentados no seu congreso anual. Nesta ocasión presentáronse máis de 1700 traballos e entre os tres mellores na categoría de ciencia básica atópase o de Diz-Chaves, un estudo no que autora demostra que o liraglutide, un axente terapéutico empregado no tratamento da diabetes, é capaz de modular a reposta inflamatoria, o que permite abrir novas liñas de investigación para o tratamento e busca dunha cura para a diabetes e a obesidade, patoloxías que, á súa vez, están asociadas a múltiples enfermidades neurodexenerativas, entre elas

o alzhéimer.

[+info](#)

## Egeria, unha muller pioneira que rachou cos roles tradicionais

Recoñecen a inclusión da perspectiva de xénero nos traballos fin de grao e de mestrado



Diversos estudos sitúan a orixe da viaxeira e escritora Egeria na Gallaecia no século IV. Muller pioneira en moitos aspectos, peregrinou a Terra Santa e, ao seu regreso, recolleu a súa experiencia no libro *Itinerarium ad Loca Sancta*, converténdose na primeira cronista de viaxes galega. O seu exemplo de muller aventureira, peregrina e escritora, toda unha pioneira rompendo roles de xénero na antigüidade, é o que tratan de preservar os Premios Egeria que convoca a Unidade de Igualdade da

Universidade de Vigo para poñer en valor a inclusión da perspectiva de xénero nos traballos fin de grao e de mestrado. O prazo de presentación de solicitudes remata o 20 de deste mes de setembro.

[+info](#)

## Vigo converterase a próxima semana no epicentro da análise dos retos da xestión universitaria

200 profesionais abordarán cuestións como financiamento, profesionalización ou xestión de recursos



A Universidade de Vigo acollerá entre os días 20 ao 22 de setembro a 35ª edición das Jornadas de Gerencia Universitaria nas que uns 200 profesionais, entre poñentes e público, analizarán cuestións fundamentais para o desenvolvemento da súa actividade nas universidades. "O formato das xornadas deste ano é totalmente distinto a como se fixeron en anteriores ocasións. Trátase de abordar temáticas que non sexan lugares comúns para todos e nós pretendemos que se fale de temas diferentes, cousas que preocupan e que van enlazadas con poñer en valor, tanto á Universidade de Vigo como o Sistema Universitario Galego, SUG", explica o xerente da institución académica viguesa, Manuel Fernández Jáuregui, que hai ano e medio aceptou o reto de deseñar as xornadas, organizadas por Crue Universidades Españolas.

As xornadas desenvolveranse baixo o lema *Retos en la gestión de los recursos en las universidades, desarrollo y estrategias de futuro*.

[+info](#)

## 54 medidas para facer de Pontevedra un campus máis verde

Do 19 ao 21 de setembro, desenvolveranse diferentes actividades arredor do vial central, pechado ao tráfico



Desde finais de 2015, ondea en Pontevedra a bandeira verde coa que a FEE recoñece o labor de educación e xestión ambiental de campus e facultades. Unha bandeira que é o resultado das múltiples accións desenvolvidas nos últimos anos ao abeiro do proxecto Green Campus, que neste novo curso continúa o seu labor de concienciación coa implantación do seu terceiro plan de acción. 54 medidas, vinculadas a oito obxectivos estratéxicos, integran un documento realizado segundo "criterios pragmáticos e realistas", como sinala o director da Área de Planificación, Celso Cancela. Entre elas figuran accións como a conmemoración da Semana Europea da Mobilidade, coa que entre o

martes 19 e o xoves 21 porase inicio á implantación do documento.

[+info](#)

## Torallamar consolídase como observatorio de referencia en eventos náuticos celebrados nas Rías Baixas

Levan máis de catro anos ofrecendo medidas en tempo real de datos meteorolóxicos e oceanográficos



O portal de información oceanográfica e meteorolóxica Torallamar, desenvolvido polo Grupo de Oceanografía Física e persoal do Centro de Investigación Mariña da Universidade de Vigo, consolidouse este verán como observatorio de referencia para as travesías a nado de longa distancia celebradas nos últimos meses nas Rías Baixas, entre elas, o Desafío Illas Cíes (10 km), a Batalla de Rande (27 km), Arousaman (13 km) ou a Tripe Coroa Illas Atlánticas (28 Km). O centro leva xa máis de catro anos ofrecendo medidas en tempo real das condicións meteorolóxicas e oceanográficas.

[+info](#)

## A programación deportiva do campus ponse en marcha

Entre as novidades do primeiro cuadrimestre está un ciclo específico para mulleres



O curso académico 2017/2018 xa está en marcha e en marcha está tamén a programación de actividades coas que a Universidade de Vigo quere complementar a formación integral dos seus membros. Co obxectivo un ano máis de fomentar a actividade física e a vida saudable entre alumnado, persoal de administración e servizos e persoal docente e investigador, a Área de Benestar, Saúde e Deporte ofrece unha ampla oferta de instalacións e actividades, que abranguen desde a práctica do rugby a bailes de salón. Entre as novidades deste primeiro cuadrimestre

está un ciclo centrado na muller e a consolidación do servizo de adestramento personalizado.

[+info](#)

## Ciencias da Educación e Historia acadan a certificación Fides-Audit e o selo Q da Universidade

O reitor Salustiano Mato fixo entrega ás súas decanas das distincións acreditativas



As facultades de Ciencias da Educación e Historia do campus de Ourense veñen de acadar a certificación do seu Sistema de Garantía Interno de Calidade, que concede a través do Programa Fides-Audit a Axencia para a Calidade do Sistema Universitario de Galicia Acsug. Tras superar este proceso en xullo, a Comisión de Calidade da Universidade de Vigo aprobou outorgarlles ademais o selo de calidade Q, un selo propio co que a institución académica busca recoñecer e dar visibilidade aos méritos acadados neste eido por facultades, escolas, servizos, laboratorios ou centros de

investigación.

[+info](#)

## Unha xornada para falar de arte e deporte con perspectiva de xénero

Trátase de dúas actividades patrocinadas pola Unidade de Igualdade da Universidade



Reflexionar sobre o papel da muller na creación contemporánea, analizar como as e os artistas afondan na idea de xénero ou debater sobre os estereotipos vinculados a deportes como a ximnasia rítmica. Estes son tres dos obxectivos que conflúen nas dúas xornadas que, co patrocinio da Unidade de Igualdade, se desenvolven o vindeiro mércores no campus. Neste día, Ciencias da Educación e do Deporte acolle *Expresión artística e xénero*, integrada por cinco conferencias centradas nos deportes artísticos e na plástica contemporánea, mentres que en Belas Artes terá lugar o

coloquio *Entre a escena e a arte de acción*..

[+info](#)

## A EE Forestal, primeiro centro do campus en recibir o Q de calidade

A súa concesión é consecuencia da certificación á implantación do seu sistema por parte da AGSUG



En xuño do pasado ano, a EE Forestal convertíase no primeiro centro do campus en obter a certificación á implantación do seu sistema de garantía interna de calidade, despois de superar a avaliación dunha comisión externa da Axencia para a Calidade do Sistema Universitario de Galicia (ACSUG). Este recoñecemento fixo posible a súa vez que a Comisión de Calidade da Universidade acordase outorgar á escola o Q de calidade, un selo propio co que a institución académica busca recoñecer e dar visibilidade aos méritos acadados neste eido por facultades, escolas, servizos, laboratorios ou centros de investigación.

[+info](#)

## Dez opcións de obradoiros para formarse alén das aulas

Poden apuntarse membros da comunidade universitaria e cidadáns en xeral



Dez obradoiros de temáticas moi diversas, 175 prazas, unha media de 30 horas de formación por cuatrimestre e un prezo que vai dos 26 aos 40 euros segundo o tipo de público. Con estes datos vén de facerse pública a oferta de obradoiros deste cuatrimestre e as aulas que se desenvolverán durante todo o curso no campus de Ourense. Unha vez máis, esta programación preséntase co obxectivo de complementar a formación tanto dos membros da comunidade universitaria como cidadáns en xeral en diferentes áreas, desde o teatro e a danza á sexualidade e o

benestar integral.

[+info](#)

## Preto de 20 especialistas afondan na necesidade dun novo relato para a Unión Europea

Na conferencia inaugural, Camilo Nogueira defendeu a UE como un "fito democrático revolucionario"



Tras formular unha ollada integral á acción exterior de Galicia na súa edición inaugural, o Congreso de Estudos Internacionais de Galicia que a Área de Ciencia Política e da Administración da Universidade promove xunto co Igadi buscou para a súa segunda edición centrarse nun dos marcos de acción exterior de maior incidencia para o país. Ese non podía ser outro que a Unión Europea, "o primeiro bloque internacional no que debe saber desenvolverse Galicia" e o eixo do debate que hoxe luns e mañá martes reúne na Facultade de Ciencias Sociais e da Comunicación a preto de 20 expertos en áreas como a política ou a economía, co propósito de analizar, desde Galicia, o futuro dunha unión "que está atravesando uns momentos de crise, sobre todo arredor do Brexit, pero tamén da rexeneración que busca o eixo franco-alemán", como apunta o director do Igadi, Daniel González Palau.

**O proxecto Dockside, coordinado pola Université de Nantes, colabora coas institucións do país asiático**



## Vigo asesorará as universidades de Cambodja na posta en marcha de programas de doutoramento do eido mariño

Unha delegación de reitores e investigadores visita esta semana o campus



A experiencia da Universidade de Vigo no eido mariño, tanto dende o punto de vista científico como de xestión económica e xurídica, servirá como guía para a posta en marcha de programas de doutoramento en Cambodja que condúzan a mellorar a calidade e relevancia da educación superior deste país. Esta colaboración enmárcase no proxecto Dockside, que coordina a Université de Nantes, e do que forman parte as universidades de Vigo e Syddansk (Dinamarca) e, por parte de Cambodja, o Ministerio de Educación, Xuventude e Deportes, a Universidade Nacional de Administración, a Real Universidade de Dereito e Economía, a Real Universidade de Agricultura e a Universidade de Battambang. O proxecto arrancou en outubro de 2016 e estenderase ata

2019 e, tras varias xuntanzas no país asiático, esta semana unha delegación cambodjana visita o campus de Vigo.

[+info](#)

## A diversión substitúe aos coches no campus de Pontevedra

Diferentes actividades lúdicas buscan nestas xornadas sensibilizar sobre o uso de transportes alternativos



Un circuíto dedicado a medios de transporte alternativos, a realización dun mural ou postos informativos sobre actividades para a mocidade e hábitos de ocio saudable ocupan desde este martes un espazo habitualmente reservado aos vehículos no campus de Pontevedra. A conmemoración da Semana Europea da Mobilidade pecha durante estes días ao tráfico o treito da estrada central situado entre a rotonda de acceso ao campus da Xunqueira e a situada fronte a Ciencias da Educación e do Deporte, ambas abertas á circulación. No seu lugar, este espazo é ocupado nos mediodías de martes, mércores e xoves, por unha serie de propostas lúdicas abertas ao conxunto da cidadanía. "É o

segundo ano que celebramos esta actividade, que se enmarca no plan de acción do proxecto Green Campus", salienta o vicerreitor do campus, Juan Manuel Corbacho.

[+info](#)

## Universidade e Deputación alíanse para formar en igualdade a profesorado e alumnado

Impartido por María Álvarez Lires e Azucena Arias, desenvolverase entre outubro e marzo



Grazas ao convenio de colaboración asinado este martes no Pazo Provincial, a Universidade de Vigo e a Deputación Provincial de Pontevedra impulsarán un programa de formación en igualdade dirixido tanto ao profesorado e alumnado universitario como ao persoal docente dos centros dependentes da institución provincial e dos centros de ensino dependentes da Consellería de Educación. O ente provincial financiará, con máis de 7000 euros, este curso coordinado polas profesoras María Álvarez Lires e Azucena Arias, que conta cun total de 40 prazas e que se desenvolverá no campus entre o vindeiro mes de outubro e marzo de 2018.

[+info](#)



## Os deportes artísticos non son só cousa de mulleres

A existencia de "barreiras sociais", non obstante, dificulta aos homes a práctica destas disciplinas



Os deportes artísticos son cousa de mulleres? Esta é a pregunta á que a profesora da UDC Elena Sierra tratou de responder na conferencia de apertura das xornadas *Expresión artística e xénero. Unha mirada plural*, que se desenvolven en Ciencias da Educación e do Deporte. E o seu propósito foi demostrar que non, "que, polas súas características, os deportes artísticos non dependen do xénero, senón de se tes realmente as calidades necesarias para eles". Non obstante, como salientou a profesora Rebeca Freire, deportes como a ximnasia rítmica vense afectados por unha serie "de estereotipos e barreiras sociais".

[+info](#)

## Falta de apoios e desigualdade, a dobre barreira das profesionais das artes efémeras

O coloquio contou coas intervencións das artistas Lola Correa, Gena Baamonde e María Roja



A falta de apoios para o desenvolvemento de proxectos en eidos como a *performance*, a danza ou as artes escénicas xunto coa existencia de factores de desigualdade e de discriminación. Esta é a dobre barreira que as mulleres artistas teñen que enfrontar nestas disciplinas e que tres profesionais do eido, Lola Correa, Gena Baamonde e María Roja coincidiron en sinalar nun coloquio na Facultade de Belas Artes. Promovida polo profesor Carlos Tejo e patrocinada pola Unidade de Igualdade da Universidade, a xornada *Entre a escena e a arte de acción*, tiña por obxecto promover unha reflexión "sobre o complexo presente e difícil futuro" destas disciplinas.

[+info](#)

## Divulgando sobre a necesidade de contar con persoas expertas en caso de accidentes marítimos con vertidos de substancias perigosas



A importancia de contar co asesoramento de persoas expertas no caso de que se produza un accidente marítimo con vertidos de substancias perigosas, é o obxectivo do último vídeo do Grupo Divulgare da Universidade de Vigo. A peza audiovisual, que xa está dispoñible na canle de Video do equipo que dirixe o docente e investigador do Grupo de Ecoloxía e Evolución de Plantas Luis Navarro, insírese no marco do proxecto europeo Mariner, que ten o obxectivo de mellorar a capacidade de resposta ante vertidos químicos mediante o desenvolvemento de plans de adestramento e

resposta coordinados entre distintas rexións da Europa atlántica.

[+info](#)

## 200 especialistas analizan en Vigo os retos de futuro na xestión dos recursos das universidades

A conferencia inaugural afondou nun modelo universitario baseado na innovación e non só no emprendemento



200 representantes de universidades públicas e privadas de todo o Estado reúnen-se dende este mércores e ata o venres en Vigo nas 35ª Jornadas de Gerencia Universitaria, unha edición organizada pola Universidade de Vigo que se centra en analizar os retos na xestión das universidades e en perfilar estratexias de futuro, prestando especial atención á xestión dos recursos, a profesionalización da dirección, os restos da administración electrónica, as infraestruturas e o papel da investigación e a transferencia na relación coa sociedade. O acto inaugural estivo presidido polo reitor da Universidade de Vigo, Salustiano Mato; o conselleiro de Cultura, Educación e Ordenación Universitaria,

Román Rodríguez; o presidente do Consello Social da Universidade de Vigo, Ernesto Pedrosa; o xerente da Universidade viguesa, Manuel Fernández Jáuregui e o xerente da Universitat de Lleida, Josep M. Sentís.

## O campus impulsa unha aula permanente de música tradicional

A Vicerreitoría abre tamén a inscrición nos cursos de locución audiovisual, oratoria e comisariado artístico



Nos dous últimos cursos, os obradoiros de interpretación de instrumentos populares promovidos pola Vicerreitoría contribuíron a que a gaita, o pandeiro ou a zanfona contasen cun espazo propio no campus e mesmo á que naceu nel un grupo de música tradicional. Co propósito de dotar dunha maior continuidade e entidade a esta formación, á Área de Extensión Cultural impulsa agora unha Aula Permanente de Música Tradicional Galega, que mantén aberto o seu período de inscrición. Así mesmo, a Vicerreitoría suma a estas actividades novas edicións dos talleres de

locución audiovisual, oratoria e comisariado artístico.

+info

## O alumnado súmase ao debate da Rede de Universidades Saudables

Representantes de diferentes institucións participan nos grupos de traballo sobre nutrición e actividade física



A Rede Española de Universidades Saudables (REUS), da que a Universidade de Vigo forma parte e da que o técnico da Área de Benestar, Saúde e Deporte Román Lago é un dos vogais da súa xunta directiva, celebra en Menorca o seu quinto encontro. A institución viguesa está representada nestas xornadas de debate, centradas nos eidos da actividade física e da alimentación saudable, pola investigadora do campus de Ourense Laura Ruiz, así como por dous estudantes da Facultade de Ciencias da Educación e do Deporte, Lara Piñeiro e Sergio Pérez, que se suman por primeira vez

aos debates e aos seus grupos de traballo.

+info

## A Universidade segue reducindo a súa pegada de carbono por persoa e marca outro mínimo histórico en 2016

O incremento do uso do transporte público e do gas natural, claves na redución das emisións



En 2008, a Oficina de Medio Ambiente da Universidade comezou a calcular a pegada de carbono e a pegada ecolóxica da institución. A primeira é unha medida do impacto ambiental que estuda as emisións de gases de efecto invernadoiro á atmosfera (medidas en kg de CO<sub>2</sub> equivalentes). A segunda é a cantidade de terreo estándar (medido en hectáreas globais equivalentes) que é necesaria para absorber os impactos ambientais asociados a unha actividade determinada. Nestes nove anos, as emisións dos tres campus universitarios fóronse reducindo e, segundo o estudo do 2016, que acaba de ser feito público pola OMA, volve marcarse outro mínimo histórico, con 0,95 toneladas de CO<sub>2</sub> por persoa, o que supón unha redución dun 1,75% respecto a 2015. Estas

emisións tradúcense nunha pegada ecolóxica de 7924 hectáreas globais e de 0,328 hectáreas por persoa.

+info

## A II Feira de Emprego Xurídico Galicia-Norte de Portugal celebrarase o 27 de outubro

O 25 de setembro arrancará o seu programa de actividades preparatorias



O pasado curso, a Facultade de Dereito do campus de Ourense puxo en marcha de xeito pioneiro Orienta Iuris, a primeira feira de emprego especializada no ámbito xurídico en Galicia e Norte de Portugal. Polo bos resultados acadados nesa primeira edición e co obxectivo de consolidarse como punto de encontro de estudantes, titulados e profesionais do mundo do dereito, o centro vén de anunciar a celebración da súa segunda edición o día 27 de outubro. Como anticipo a esa cita e preparación para ela, desenvolverase un programa de accións formativas para os inscritos que

arrancará o vindeiro 25 de setembro.

## O Pont-Up Store converte Pontevedra no escaparate do emprendemento

Un laboratorio de fabricación dixital e un espazo de degustación, novidades desta edición



Xente que se atreve a soñar. Ese é o lema da cuarta edición do Pont-Up Store, un evento promovido pola Universidade, dentro do Campus CREA S2i, co Concello de Pontevedra como patrocinador principal, dirixido a dar apoio e visibilidade aos novos emprendedores e emprendedoras. 40 novas empresas que son "a constatación dun futuro prometedor" para o emprendemento en Galicia, como salienta o director do evento, Pedro Figueroa, dan a coñecer os seus proxectos nas xornadas de venres e sábado no recinto instalado na Praza de España. Fano nos stands e nas actividades que engloba un evento que fai de Pontevedra "un escaparate da innovación, da creatividade e da vangarda dos emprendedores e emprendedoras de Galicia".

[+info](#)

## Micromachismos que contribúen a perpetuar as macroviolencias estruturais do patriarcado

Expertas de diferentes universidades debateron sobre esta "disimuladas situacións de desigualdade"



Enténdese por "micromachismos" as manifestacións de violencia de xénero sutís, que adoitan pasar desapercibidas no día a día. Lonxe de querer identificar estas accións discriminatorias con algo mínimo ou pequeno -a pesares do prefixo- a xornada de formación en xénero *Micromachismos, macroviolencias: debates abertos*, que tivo lugar este venres na Facultade de Filoloxía e Tradución, propuxo una reflexión conxunta sobre o impacto que estas disimuladas situacións de desigualdade supoñen para as mulleres e identidades non heteronormativas en diferentes eidos da

sociedade. O obxectivo é fornecer ao alumnado de ferramentas para detectar o intricado sistema de opresións interrelacionadas que opera na nosa cultura, que se toman como 'o normal' ou mesmo 'natural"', explica Belén Martín Lucas, docente organizadora.

[+info](#)

## Un proxecto estatal afonda nos efectos de metais pesados sobre os microorganismos do solo

O obxectivo último da iniciativa é contribuír a mellorar a xestión deste tipo de contaminación



Estudar os efectos da acumulación de metais pesados sobre os microorganismos do solo, contribuíndo a esclarecer cando sería necesario intervir nun solo contaminado por metais pesados desde o punto de vista das comunidades microbianas existentes nel. Con este obxectivo, o investigador da Universidade de Vigo David Fernández Calviño desenvolve un estudo que ten como finalidade última "xerar coñecemento que permita dispor de ferramentas axeitadas para avaliar a contaminación do solo por metais pesados, contribuíndo a mellorar a xestión destas áreas". O proxecto, centrado no uso das comunidades microbianas como indicadores do uso sostible do territorio, está financiado con 151.250 euros polo Ministerio de Economía e

Competitividade e desenvólvese por un período de tres anos nos laboratorios da Área de Edafoloxía e Química Agrícola do campus de Ourense.

[+info](#)



## Doce entidades sociais de Lisboa e Brescia acollen xa aos participantes no programa Auce Galeuropa 2017

Os beneficiarios e beneficiarias realizarán prácticas nelas ata o 30 de novembro



Por terceiro ano consecutivo a Asociación Universitaria de Ciencias da Educación Auce do campus de Ourense leva a cabo unha iniciativa de mobilidade que, baixo o título Auce Galeuropa 2017, permite a doce persoas realizar prácticas non remuneradas en entidades acordes ao seu perfil en Lisboa (Portugal) e Brescia (Italia). Os beneficiarios e beneficiarias desta edición xa están de cheo nos seus postos en todo tipo de entidades, desde centros de menores a entidades de

animación sociocultural. Tralas primeiras semanas dos participantes no estranxeiro desde a organización salientan a súa satisfacción por como se está desenvolvendo a iniciativa.

[+info](#)

## Para camiñar e aprender, doce propostas de rutas culturais

Entre as novidades estarán unha visita ás dunas de Corrubedo e outra á praia das Catedrais



12 rutas culturais pola xeografía galega abertas á participación de membros da comunidade universitaria e cidadáns en xeral con gañas de camiñar en boa compañía e sobre todo de coñecer o patrimonio natural, cultural e histórico máis próximo. Con esta premisa preséntase un curso académico máis a programación de roteiros que cada ano organiza a Área de Benestar, Saúde e Deporte da Universidade de Vigo. Co desexo de sorprender ao seu público máis fiel e o de atraer a novos camiñantes, a oferta 2017/2018 chega con moitas propostas novas.

[+info](#)

## Un congreso internacional reúne en Vigo especialistas en lingüística inglesa contemporánea de 18 países

Presentaranse traballos e teorías nas disciplinas de fonoloxía, morfoloxía, sintaxe, semántica ou gramática



A 7ª Biennial International Conference on the Linguistics of Contemporary English celébrase dende hoxe en Vigo, sendo esta a primeira vez que o congreso ten lugar en España. Tras as edicións de Edimburgo (2005), Toulouse (2007), Londres (2009), Osnabrück (2011), Austin TX (2013) e Madison WI (2015), neste 2017 é a Universidade de Vigo a encargada da súa organización. O grupo LVTC (Language Variation and Textual Categorisation), cos profesores Javier Pérez Guerra e Elena Seoane á cabeza, leva meses traballando neste simposio internacional que este xoves arrancou en Vigo coa participación de 115 persoas, entre poñentes e asistentes, procedentes de 18 países europeos e de Australia, China, Corea do Sur, Estados Unidos, Exipto ou

Xapón. A vicerreitora de Estudantes, Dolores González, foi a encargada de presidir o acto inaugural.

[+info](#)

## Os Martes Saudables arrancan o día 3 de outubro o seu percorrido polos tres campus

A hidratación será un dos temas sobre os que se informará á comunidade universitaria



Desde que no curso 2010/2011 iniciou a súa andaina no campus de Ourense, a iniciativa dos Martes Saudables tense convertido nunha cita de referencia para a comunidade universitaria interesada en mellor os seus hábitos de vida. O vindeiro 3 de outubro arrancará unha nova edición desta actividade, cuxos postos informativos sobre deporte, sexualidade, alimentación e enfermaría volverán a percorrerán os tres campus da Universidade de Vigo. Como novidades este cuadrimestre, amplíase o número de sesións en centros de Vigo e dedicarase especial atención a informar

sobre a hidratación e os seus beneficios para a saúde.

[+info](#)



## O campus celebra o Día Mundial da Tradución pondo en valor o labor das mulleres tradutoras

A actividade, organizada polo equipo Bitraga, contou coa colaboración da Unidade de Igualdade



Quen, que e como se traduce? Cun día de adianto sobre a data oficial, o 30 de setembro, este venres celebrouse no campus o Día Mundial da Tradución con dúas mesas redondas nas que se puxo en valor o labor das tradutoras, un traballo que, tal e como se recalcou durante a xornada, a miúdo está ausente dos manuais que tratan sobre a historia recente da Tradución e a Interpretación. Organizadas polas investigadoras de Bitraga –Biblioteca da Tradución Galega- coa colaboración da

Unidade de Igualdade, as mesas contaron coa participación de estudosas da tradución, tradutoras e responsables de editoras que achegaron a súa visión sobre esta profesión en e dende o enfoque de xénero, ofrecendo unha visión xeral sobre os fenómenos e tendencias máis relevantes.

[+info](#)